



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

KONFERENSIA IMPRENSA

Dili, 13 Janeiro 2007

**AUDIÊNCIA PRIMEIRU INTERROGATÓRIU BA MEMBRU F-FDTL NA'IN
11 NO MEMBRU PNTL NA'IN 1 IHA TRIBUNAL DISTRITAL DILI**

Tribunal Distrital Dili liu husi juiz Ivo Nelson de Caires Baptista Rosa iha loron Sesta-Feira, 12 Janeiro 2007 halao audiência primeiru interrogatóriu ba membru F-FDTL (*Falintil-Força Defese de Timor Leste*) na'in sanulu-resin-ida (11) no membru PNTL (*Polícia Nacional de Timor Leste*) na'in ida (1) iha Tribunal Distrital Dili. Audiência primeiru interrogatóriu ne'ebe taka ba públiku ne'e marka prezensa husi Prokurador Bernardo C. Fernandes. Arguidus na'in 12 (sanulu-resin-rua) ne'e hetan defeza husi defensor Pedro Andrade no defensor Sebastião Amado de Almeida. Sira na'in-rua ne'e husi Defensoria Pública Timor Leste nian.

Audiência ne'ebe taka ba públiku ne'e hahú iha 15:15 otl no remata iha 19:00 otl. Maibe arguidus sira rasik to'o no presente ona iha Tribunal hahú 14.26 otl. *Depois de* Julgamentu JSMP (*Judicial System Monitoring Program*) hatene informasaun husi Xefe Estado Major F-FDTL katak husi arguidus na'in 12 ne'ebe tuir audiência primeiru interrogatóriu ne'e sira na'in haat (4) maka tama ba prizaun preventiva iha Prizaun Becora-Dili. Maibe ba arguidus na'in walu (8) seluk Tribunal deside aplika medida koasaun atu ba apresenta-an obrigatóriu loron hitu-loron hitu dala ida iha Quartel Geral F-FDTL. Arguidus na'in 4 ne'ebe tama ba prizaun preventiva ne'e sira na'in tolu (3) husi membru F-FDTL no arguidu ida seluk nu'udar membru PNTL.

Hahú husi inísiu JSMP observa prosesu audiência ne'e husi liur bele hatene katak aksaun seguransa iha liur no iha tribunal laran ne'e metin teb-tebes. JSMP haree iha membru F-FDTL balu ne'ebe halao seguransa iha area Tribunal nian sira lori ho kilat boot no fardadu militar kompletu. Maibe membrus F-FDTL sira seluk ne'ebe tama ba Tribunal laran, sira la lori kilat maibe sira hotu hatais farda militar F-FDTL. Alén ida ne'e, JSMP haree mós katak Polísia Nasoins Unidas nian iha Timor Leste (UNPOL) ne'ebe mantén seguransa iha Tribunal laran ne'e mós sira lori kilat hanesan lori Pistola. Momentu ne'eba laos membrus F-FDTL sira deit maibe JSMP haree katak kuaze lideres alto F-FDTL nian inklui Xefe Estado Major Coronel Lere Anang Timur mós presente iha Tribunal hodi akompañia prosesu audiência ne'e husi besik. Maibe hanesan hatete ona katak ema hotu-hotu la tama ba sala audiência nian. Úniku arguidus sira deit.

Antes husik hela area Tribunal nian, wainhira média sira husu, Coronel Lere Anang Timur deklara katak husi parte F-FDTL nian respeito desizaun Tribunal nian. Arguidus sira mós tenke respeito no hakruuk ba desizaun Tribunal nian atu tama ba prizaun preventiva iha Prizaun Becora-Dili. Nune'e mós ema arguidus sira seluk ne'ebe Tribunal decide ona atu halao tuir medida koasaun hanesan obrigasaun atu apresenta-an iha Quartel Geral F-FDTL nian atu hein prosesu investigasaun husi Ministériu Públiku Timor Leste nian.

JSMP simu no konsidera desizaun Tribunal Distrital nian ne'e. Medidas koasaun ne'ebe aplika ba arguidus sira mós tuir ida ne'ebe regula ona iha artigu 191 no 194 KPP. Iha parte seluk, JSMP valoriza / respeito prezensa Xefe Estadu Major F-FDTL nian hamutuk ho membrus besik na'in atus (100) ne'ebe marka prezensa iha Tribunal hodi akompaña prosesu audiênsia primeiru interrogatóriu ba membrus F-FDTL no PNTL ne'ebe hetan akuzasaun prátika ou partisipa ba komete aksaun krime tiru mate membrus PNTL sira iha Ministériu Justisa Timor Leste nia oin iha loron 25 Maiu 2006.

JSMP mós konsidera katak to'o memento ida ne'e, Timor Leste seidak iha Tribunal Militar, maske buat ida ne'e determina ona iha artigu 130 Konstituisaun Timor Leste nian. Nune'e, tuir Lei ne'ebe vigora Tribunal Distrital Dili iha kompetensia eksklusivu atu bele julga prosesu kriminal ne'ebe involve membrus militares hirak ne'e. Maibe JSMP nia hanoin, tuir lolós Lideres altu husi Militar F-FDTL nian hirak ne'e la prezisa atu presente iha Tribunal. Tanba, tuir JSMP, prezensa Lideres Altu F-FDTL nian hamutuk ho nia membrus sira ne'ebe kompletu ho kilat boot sira hanesan ne'e, maske husi parte F-FDTL nian ho intensaun diak atu hatudu sentidu solidariedade ba arguidus sira maibe tuir populasau sivil sira nia hanoin, haree no nia valorizasaun katak aksaun hanesan ne'e ho intensaun mai atu fo presau no halo tauk fali autor tribunal sira wainhira sira atu halo julga ou prosesa ba arguidus sira ninia kazu ne'e.

UNTUK INFORMASI LEBIH LANJUT SILAHKAN HUBUNGI:

Maria Vasconcelo

Acting Director, JSMP

Telephone: 332 3883

Email: vasconcelosmerry@yahoo.com